

## Hebreos

### Jesucristupi kriyiq Hebreo runakunaman karta

Manami yaĉhanchikchu mayqanmi kay librutaqa iskribiran nirmapis. Chaqa kay librupiqa manari rimanchu. Piru chaynu katinmapis wakinkunaqa Bernabimi iskribisha kanqa nir yarpunllapa (Hechos 4.36; 13.1-5). Nataq wakinkunaqa yarpunllapa Apolos iskribisha kanqa nir. (Hechos 18.24-25; 1 Corintios 1.12; 3.4-8; 3.22-23). Wakinkunaqami yarpunllapa uk runa iskribisha kanqa nir. Piru mayqan karmapismi kay librutaqa iskribiran uk Israel runa, Jesucristupi kriyiq Israel masinkunapaq (Hebreo rimaq masinkunapaq).

Kay librupimi intrachimanchik imanumi Jesucristuqa kusala mas pudirniyun angelninkunamanta, (1.4–2.18), Moisesmanta (3.1–4.13), chaynulla kurakunamantapis (4.14–5.10; 7.1–28). Chaynullami intrachimanchikpis payqa kusala mas mantakuq nir. Chaynumi kay libruqa intrachimanchik imanumi Tayta Dyusqa mushuq tratuta ruraran runakunata washananaqaq nir (8.1-13). Chaynullami intrachimanchikpis uchanchikpaq animalkunata apar altarpi rupachinamantaqa, ashwan Jesucristupi kriyisha uchanchikkunamanta pirdunamanchik nir. (9.1–10.18).

Intrachimanchikpismi Jesucristupi kriyirllana imuraspis kawsanallapapaq (5.11–6.20; 10.19–39). Chaynumi kay librupiqa intrachimanchikllapa imanu qischakarmapis kriyishanchiknulla shachinakunallapapaq nir. (11.1–12.29). Chaynullami kusa mas shumaq imakunata intrachimanchikpis (13.1–25).

---

#### Dyusmi kananqa Wamran

#### Jesucristuwan intrachimashanchik

**1** <sup>1</sup>Unay tyimpukunaqami, Tayta Dyusqa rukunchikkunata kusa achka shumaq imakunawan kutir kutir intrachiran. Chaynuqami paypa rimaqninkuna intrachikuranllapa. <sup>2</sup>Ashwan kanan tyimpukunaqami, Dyusninchikqa imatapis intrachimanchikllapa Wamran Jesucristuwanna. Chaqa Dyus nitinmi payqa tukuy ima rikayashanchikkunatapis ruraran.

Chaynullami tukuy imatapis payna rikananpaq Dyusqa qusha. <sup>3</sup>Chaymi paylla Dyus kar, intrachimanchikllapa Taytan Dyus kusa allin kar shumaqta llipyarayashanpaqmapis, Dyusta michka mana rikasha kashallapamapis. Chaynulla kusa puytiq rimayninwanmi tukuy imatapis rikar kuytan. Chaymi uchanchikkunamantapis pirdunar shumaqchamaranchikllapa. Chaymantami sylipi Dyusninchik tar mantakuyashanpiqa, allilaw qichqan-pina tasha.

**Dyuspa Wamran Jesucristuqami  
angelkunamantaqa tukuy  
imapi mas**

<sup>4</sup>Jesucristuqami Dyuspa Wamran kar, kusa mas mantakuq, mas yaĉhaq karan syilumanta kaq angelkunamantaqa.

<sup>5</sup>Chaqa Dyusqami, mana mayqan angelapis kaynu niranchu:

“Qammi Wamray kanki.

Nuqami kananqa Taytaykipaq  
riqsikani” nirqa.

Chaynulla manami mayqan angelpaqpis kaynu niranchu:

“Nuqami paypaqa taytan kashaq.

Nataq payqa nuqapa wamray  
kanqa” nirqa.

<sup>6</sup>Piru qashan uk iskrifikashapiqa, uklayla Wamranta kay pachaman kaĉhamushanpaq, kaynu nin:

“Dyuspa tukuy angelnin kaqkunaqa,  
payta aduranqallapa” nir.

<sup>7</sup>Nataq angelkunapaq-shuypaqa, kaynu nin:

“Angelkunaqami wayra yupayla,  
nina ratakuq yupayla karmapis,

“sirbimaqniykuna kanqallapa” nir.”<sup>a</sup>

<sup>8</sup>Wamranpaq-shuypaqa, kaynu nin:

“Dyuslla katkimi, tukuy tyimpupaq  
mantakunaykiqa kanqa.

Chaqa qamqa imatapis karanta  
rikarmi mantakunki”.

<sup>9</sup>“Qammi allin ruraykunata munanki.  
Nataq chay mana allin ruray-

kunataqami ĉhiqninki.

Chayraykumi nuqa Dyusniki kar  
akrashur,  
kusa masta aligriyachishusha kani  
tukuy wakinnikikunamantaqa”  
nir.

<sup>10</sup>Kaynumi ninpis Jesucristupaqqqa:

“Qammi Amituy, pachata ima  
kaqnintinta rurarayki.  
Qamlami makikiwan syilutapis  
rurarayki.

<sup>11</sup>Chay rurashaykunami maydiyaqa  
tukukanqa. Piru qamqami tukuy  
tyimpu, mana chinqankichu.  
Tukuy chaykunaqami raĉhpaa  
makwayar llikan chaynu  
tukukanqa.

<sup>12</sup>Qammi dublanki, imanutaq  
raĉhpata dublanllapa chaynu.  
Chaynulla kambyankipismi  
imanutaq raĉhpawan mudakun-  
llapa chaynu.

Piru qamqami, qamlla kanki.  
Manami bidaykiqa maydiyapis  
tukukanqachu” nir.

<sup>13</sup>Dyusmi mana mayqannin angelapis  
kaynuqa niranchu:

“Tay allilaw qichqaypi,  
nuqa chay ĉhiqnishuqkunata  
ĉhakikipa ĉhakinman ĉhuramutiy  
binsinaykikaman” nirqa.

<sup>14</sup>Chaqa tukuya angelkunaqami  
wayra yupayla karmapis, Dyusta  
sirbinllapa. Chaymi sirbiqnillapa katin,  
Dyusqa kaĉhamun washakanaqkunataqa  
mayqantapis yanapananpaq.

**Washamaqninchiktami  
allita kasuypaq**

**2** <sup>1</sup>Chayraykumi tukuy willamashan-  
chikllapata allita uyakur kasuypaq-  
llapa, Dyusninchikpa nanninmanta  
amana wakaq tukunallapapaq.

<sup>2</sup>Unay tyimpumi Dyusqa angelinkunata  
willaran yaĉhachikutinllapa, pay mantaku-  
shannullata kasur, karalata ruranallapa-  
paq. Chaymi chay yaĉhachikushanllapa-  
kunata mama kasur uchakuqkunataqa,

**a 1.7** Angelkuna wayra yupayla nirqami niyanchik dasla maytapis puriq kashanpaq.  
Chaynulla nina ratakuq yupayla nirqami niyanchik, ninamaqa takshala karmapis dasla  
rupachikuyta puytin chaynu kashanpaq.

chay mantakuy<sup>b</sup> nishannulla kastigaqlapapis. <sup>3</sup>Nataq kanan tyimpukuna chaynu katinqa, ¿imanunari washakashunllapa, chay kusala shumaq washamaqinchik Jesucristuta mana kasurmaqa? Chaqa Amitunchik Jesucristuri puntata wakinkunata intrachiran kay washakayan-chik chaypaqqa. Chaymantaraqmi chay uyakuqkuna nuqanchikkunata willar intrachimarananchikllapa. <sup>4</sup>Chaynulla chay uyakuqkunataqa, Dyus munashannulla Santu Ispiritu yanapatin kusa dispantakay-paqkunata, mana ruraypaq shumaq imakunata, milagrunkunata ima ruraran. Chayna chay rurashanllapakunapaq, Tayta Dyusmi rurachisha nir kriyirqa, yañchanchikllapa Jesucristupis chiqapta washamanchikllapa nir.

**Jesucristumi pachaman shamur  
runakuna yupay tikrakaran**

<sup>5</sup>Dyusqami maydiya shamuq mushuq pachapaq parlayanchik chaykunataqa, manami angelkunatachu qusha rikanan-llapapaqqa. <sup>6</sup>Ashwanmi Dyus nitin iskribikashakunapiqa kaynu nin:

“¿Imataq runaqa paypaq yarpunay-  
kipaqqa?

¿Imataq kawsaq runaqa llakipa-  
naykipaqqa?

<sup>7</sup>Ashwan rurarmaqami, angelkuna-  
manta uk ratulapaq ikikaqnin  
yupay kananpaq ruraryki.

Piru chaynu katinmapis, kusala  
shumaq imana kananpaq  
tikrarayki.

<sup>8</sup> Chaymi tukuy imatapis, payna  
éhakinpi éhurakuq yupay  
rikananpaq qurayki” nir.

Chaynu katinqa tukuy imata éhakinpi  
éhuraq yupay tukuy imata rikananpaq  
nirqami, Dyusqa mana tukuy imakuna-

tapis chaynulaqa dijaranchu. Piru chaynu katinmapismi, runataqa manaraq rikayanchikchu tukuy imata rikaqtqa. <sup>9</sup>Chaqa yañhashanchiknumi, uk tyimpuka Jesusqa runakuna yupay tikrakatin, Dyusqa uk ratulapaq angelkunapa ikillan kaqninta yupay rikaran. Chaqa Dyus munamarnin-chikmi paytaqa dijatin, chay uraqa kusata qischakar tukuypaq wanuran. Chaynu karmi kusata alabakar, kusa shumaqtana kurunakusha.

<sup>10</sup>Tukuy imakunami kan Dyuspaqqa. Chaqa payraykumi tukuy imapis kan. Chaymi payqa, tukuy wamrankuna chay kusa shumaq mantakunan Luryanpi kananta munaran. Chayraykumi Wamran Jesucristuta kay pachaman kañhamuran, tukuy runakunapa uchanllapapaq wanunanaqa. Chaymi Jesucristuqa, Dyus munashannullata rurar kusata qischakar kumpliran, tukuy washakasha kananllapapaq. <sup>11</sup>Chaqa tukuylari uk taytalamanca kanchikllapa, washakuq chay, chaynulla paypa kaqkunapis. Chaynu kashallapami Dyuspa Wamran Jesusqa, mana pinqakunchu kriyiq masiykuna kankillapa nimayninchikllapataqa. <sup>12</sup>Chaqa Dyus nitin iskribikashakuna-piqa Jesucristo kaynu nin:

“Qampaqmi parlashaq kriyiq  
masiykunata.

Chaynulla tantakashakunapa  
chaypinllapapipis alabar  
takichishayki” nir.

<sup>13</sup>Chaynullami ninpis:

“Paypimi nuqaqa kunfyakashaq” nir.

Qashan uk pachapiqa kaynu nin:

“Kaypimi nuqaqa kani,

Dyus wamraykunata qumashan-  
kunawan” nir.

**b 2.2** Chay mantakuy nirqami, rimayanchik unay Moisés mantakushankunalapaq. Rikashun Hechos 7.53, Gálatas 3.19.

<sup>14</sup>Yačhashanchiknu uk ayllumanta kaqkunapa wamrankunaqa uk aychalamanta, uk yawarllamanta. Chaynumi Jesucristupis nuqanchikkuna yupay aychayjun, yawarnijun karan. Chaynu karmi pay wanurqa, binsiran chay wanuchikunapaq pudirnijun kaq dyablutaqa. <sup>15</sup>Chaynumi washaran tukuyta, nasishanmanta-pacha wanunallapapaq manchakur kawsaqunataqa. <sup>16</sup>Chaqa chiqaptami Jesucristuqa mana angelkunata washaqchu shamuran. Ashwanmi Abrahampa ayllunmanta kaqkunata washaq shamuran. <sup>17</sup>Chaynu karmi Jesucristuqa tukuy imapi nuqanchikkunana karan. Piru Tayta Dyusta kusa allita kasuq karmi, nuqanchikkunata munamarninchik Dyuspa naypanman qimikaran kurakunapa mantaqnin yupay. Chayna kruspi wanushanrayku Tayta Dyusqa uchanchikkunata pirdunamaranchikllapa. <sup>18</sup>Chaynulla, imanutaq Jesucristuta kusala saqra imakunapi dyablu rikarichinatinmapis payqa shachinakuran. Chaymi mayqanpis kanan, pay munashanta rurar qischakar imakunapi rikariqkunamatapis, yanapayta puytin.

#### **Jesucristumi Moisesmantapis mas mantakuqqa**

**3** <sup>1</sup>Kusa allinla kriyiq masiykuna, Tayta Dyusmi qamkunata akrashushallapa paypa wamrankuna kanykilapapaq. Chaymi nuqanchikkunaqa rimanchikllapa Tayta Dyus, Jesucristuta kačhamuran pay kurakunapa mantaqnin kananpaq nir. Chayrayku ashwan Jesucristulapina yarpukushunllapa. <sup>2</sup>Chaqa Tayta Dyus munashankunalata kay pachapi rurananpaq Jesucristuta kačhamutinqa, payqa kararlata ruraran. Chaynullami Moisespis imatapis kararlata kusa shumaqta ruraran

Israelmanta kriyiqkunawanqa. <sup>3</sup>Piru Jesucristutaqami masta Moisesmantapa kasunapaq allin. Chaqa imanutaq uk wasi ruraqmataqa wasi rurashanmanta masta rispitanchik, chaynumi Jesucristupis masta kasuypaq Moisesmantapa. <sup>4</sup>Tukuy wasikunatami mayqan ruratin rurakan. Piru Tayta Dyusmi tukuy imatapis rurasha. <sup>5</sup>Chaynullami Moisespis Dyusta sirbiq kar, Israelmanta kriyiqkunawanqa tukuy imatapis kararlata ruraran. Chaymi uk tistigu yupay intrachimanchik maydiyaqami Jesucristo shamuyanqa nir. <sup>6</sup>Piru Jesucristuqami Dyuspa Wamran kar, kusa allinla karan Dyuspi kriyiqkunawanqa. Chayna nuqanchikkuna paypi kriyishanchikrayku, paypa wasin yupay kanchikllapa. Chaymi paymanta mana chiqanchakarchu aligrila kunfyakashunllapa Amitunchik shamur pullakur apamanallapakaman.

#### **Imanumi Dyuspi kriyiqkunaqa samanqallapa**

<sup>7</sup>Chayraykumi Dyuspa Santu Ispiritunqa kaynu nin:

- “Kanan diya qamkuna, Dyus nishankunata uyakurqa,
- <sup>8</sup> kriyinaykillapamanta ama anku shunquqa tikrakankillapachu, imanutaq wakinkuna Dyuspa kuntran tikrakar, ukman mana allinkunata chunllaq lugarpi ruraranllapa chaykuna yupayqa.
- <sup>9</sup> Chaypimi michka kwarinta añuta paykunawan kar kusa allin imakunata rurasha katiymapis, unay rukuykillapakunaqa munashankunata ruraranllapa.<sup>c</sup>
- <sup>10</sup> Chayraykumi chay tyimpu runakunawanqa piñakuray.

c 3.9 Rikay Salmo 95.7-11; Números 14.1-12, 20-23.

Chaymanta kaynu niray: ‘Shunqunllapapiqami chinqasha yupayna purinllapa.  
Chaynulla chay nishaykunata yačhachitiympis, mana kasumaranllapachu’.

- <sup>11</sup> Chaymi, piñakurqa kaynu nir juraray:  
‘Manami yaykunqallapachu samananllapapaq arnishay pachamanqa’ nir”.

<sup>12</sup> Kriyiq masiykuna, kuytakarllapami, ama shunquykillapata ankuchankillapachu. Chayna chiqap kawsaq Dyusmantaqama chiqanchakanaykilapapaqchu. <sup>13</sup> Ashwanmi uknikillapa uknikillapa waran waran animachinakunkillapa. Chay iskribikashakunapi kanan niyan chaykunata allita intrakarllapapaqami, qamkunaqa mana dasqa ingaňakankillapachu. Imanupiqačhi ingaňakar shunquykillapata ankuchar, Dyuspaqqama allinta rurayankillapa kanqa. <sup>14</sup> Chaqa Jesucristo pullakumana-paqqami, imanutaq chayraq kriyiq qallarir allita paypi kriyiranchik chaynulla, maydiya tukukanan tyimpuchaymunankamanpis allita kriyipaq. <sup>15</sup> Chaqa chaynupaqmi iskribikashakunapi kaynu nin:

“Kanan diya qamkuna, Dyus nishankunata uyakurqa, kriyinaykillapamanta ama anku shunquqa tikrakankillapachu, imanutaq chay mana allinkunata ruraranllapa chaykuna yupayqa” nir.

<sup>16</sup> Yačhashanchikllapanumi, Moisés Egiptomanta runakunata lluqshichimuran. Chaymi chay lluqshichimushanllapa chaykunaqa, Amitunchik nishankunata uyakusha karmapis mana kasuranllapachu. <sup>17</sup> Chaynulla chay chunllaq lugarkunapimi, kwarinta añuta mana kasukur imami uchakur tayarmapis wanuranllapa. Chaynu

uchakushanllapapaqmi Dyusninchikqa piňakuran. <sup>18</sup> Chaymi payqa jurar niranipis, mana kasukushanllaparaykushi paykunaqa, samachinanpaq arnishan pachamanqa mana yaykuyanqallapachu nir. <sup>19</sup> Chiqaptaqami paykunaqa, Amitunchikwan mana pulla shumaq kaytaqa puytiranllapachu. Chaqa manari kasukushachu karanllapa.

**4** <sup>1</sup>Dyusmi nuqanchikkunatapis pay kayashanman yaykur pullan samanapaq arnimanchikllaparaq. Chayrayku kusata kuytakaypaqlap. Kuytawkish imanupi qamkunamanta ukllaqa mana pullanqa katkillapachu. <sup>2</sup> Chaqa nuqanchikkunamatapismi willamashanchikllapa imanumi washakayashunllapa nir, imanutaq paykunata willaranllapa chaynulla. Piru paykunataqa michka uyakusha katinllapamapis, manami sirbiranllapachu. Chaqa manari kriyiranllapachu chay washakananllapapaq willashanllapapiqa. <sup>3</sup>Piru nuqanchikkunaqami, kriyishanchikllaparayku Dyus samachimanallapapaq arnimashanchikllapa karan, chaymanqa yaykunchikllapa. Nataq Dyusqami chay unay mana kasukuqkunapaqqa kaynu niran:

“Piňakurqa kaynu nir juraray:  
Manami yaykunqallapachu samananllapapaq arnishay pachamanqa” nir.

Piru Dyusqami samashana karan, tukuy imakunata rurar tukchishana kar.

<sup>4</sup> Chaqa Dyus nitin iskribikashakunapiqami, uk pachapiqa chay syiti diya kaqpaqqqa kaynu nin:

“Dyusmi tukuy imata rurashana karqa, chay syiti diya kaqpiqa samaran” nir.

<sup>5</sup> Qashanmi chay iskribikashakunapiqa uk pachapi kaynu nin:

“Manami yaykunqallapachu samananllapapaq arnishay pachamanqa” nir.

<sup>6</sup>Piru faltanllaparaqmi wakinkunaqa chay samananllapapaq pachaman yaykunanpaqqa. Chaqa chay mana kasukushanllaparaykumi, mana yaykuranllapachu chay washakananllapapaq puntata uyakusha chaykunaqa. <sup>7</sup>Chayraykumi Dyusqa qashan akrasha uk diyata. Chayqami “Kanan diya”. Chaytaqami willamashanchikllapa unay may tyimpumantaraq. Piru Davidqami unay iskrifikashakuna nishannulla kaynu niran:

“Kanan diya qamkuna, Dyus  
nishanta uyakurqa,  
kriyinaykillapamanta ama anku  
shunquqa tikrakankillapachu”  
nir.

<sup>8</sup>Nishaykillapa: Josué, Israel runakunata chay samana pachaman yaykuchir samachishana katinqa, Dyusqami manana rimanantachu uk samana diyapaqqa. <sup>9</sup>Chaynu katinqa, kanraq-ari uk samanapaq diyaqa, Dyuspa wamran kaqkunapaqqa. <sup>10</sup>Chaqa mayqanpis Dyus samachinanpaq chay arnishan pachaman yaykuqqa, unay rurayashankunata dijaq yupayna saman, imanutaq Dyus tukuy imata rurarqa samaran chaynulla. <sup>11</sup>Chayraykumi shachinakur chay shumaq samana pachaman yaykunapaq yarpushunllapa. Chayna ama mayqanpis chay mana kasukuq yupayqa kanallapapaq.

<sup>12</sup>Chaqa Dyuspa rimayningqami chiqapta kawsaq kar riman. Chaymi imanutaq uk ispadamaqa kada ladunman filuyjun kar das kuchukun, chaynumi Dyuspa rimayninpis das allita intrachikun. Chayna runakunapaq yarpuyinman, shunqunman, tullunman, ñutqunkunaman imapis dasla ratakun. Chaynu karmi runakuna yarpuyashanta, ruranayashanmatapis tantar yačhan. <sup>13</sup>Tukuy ima rurakashakunaqami, Dyuspaqqa shutillapi kanqa.

Chaymi tukuy imapis paymantaqa mana pakapllaqa kanqachu. Chaqa tukuy mi naypanpi kashallapa, rikar yačhamanchikllapa.

**Jesucristumi qischakashanrayku  
Dyusman mañakur imapipis  
yanapamanchik**

<sup>14</sup>Jesucristumi Dyuspa Wamranqa. Paymi kurakunapa mantaqnin karna, Dyusman imapipis mañakur yanapamalla paq syilumanqa risha.

Chayrayku pay tukuy nimashanchik-kunapi allita kriyishanchikkuna-mantaqa, ama chiqanchakashunllapachu. <sup>15</sup>Chaqa Dyuspaq kusa shumaqta yačhachimarninchik payman mañakuq kuraqami, imanula kashamapis llakipamayninchikta puytin. Chaynulla nuqanchikkunata yupay uchakuchin ranllapa ima. Piru payqami mana imalapipis uchakuranchu. <sup>16</sup>Chaymi pay kurakunapa mantakuqnin kar nuqanchikkunapaq mañakutinqa, kusalata kunfyakar llakipakuq Tayta Dyusman qimikar mañakushunllapa. Chayna nuqanchikkunata munar llakipamarninchik, tukuy ministishanchikkunapipis yanapamanallapapaq.

**5** <sup>1</sup>Tukuy kurakunapa mantaqnin-kunataqami, runakunamanta akranllapa. Chayna Dyusman pay qimikar runakunapaq mañakunapaq, chaynulla ufrindanta čhurananpaq, runakuna uchanpaq nir animalkunata apashanta wanuchinanpaq ima. <sup>2</sup>Chaqa kurakunataqami, uchayjun runakunamanta akranllapa. Chaymi mayqantapis mana yačhaq kaqkunata, mana allinta rurashanrayku chinqasha yupay kaqmatapis, llakipayta puytin.

<sup>3</sup>Chaynami paypis chaynu kar, Dyuswan shumaqna kananpaqqa, paypa uchanpaq, chaynulla ukkunapa uchanpaqmapis, animalkunata wanuchi-

yanqa. <sup>4</sup>Manami mayqanpis chaykunata rurananpaqqa payllaqa akrakanchu. Ashwan Dyusmi chaynu kananpaqqa akran, imanutaq kura Aaronmataqa chaynu kananpaq akraran chaynulla.

<sup>5</sup>Chaynullami, Jesucristupis mana payllachu kurakunapa mantaqnin kananpaqqa akraran. Ashwan Dyusmi chaynu kananpaq akraran. Chaqa paymi kaynu niran:

“Qammi Wamray kanki.

Nuqami kananqa Taytaykipaq riqsikani” nir.

<sup>6</sup>Qashanmi iskribikashakunapi uk pachapipis, kaynu niran:

“Qammi tukuy tyimpupaq kura kanki,  
imanutaq Melquisedec kaq chaynulla” nir.

<sup>7</sup>Piru Jesucristo kay pachapi karllaraq-qami, kusa jwirtita rimar, llakir waqr ima Dyusman mañakuran, wanunapaq chaymanta washayta puytin nir. Chaymi payqa Dyus nishanlata ruraq katin, Dyusqa uyar yanaparan. <sup>8</sup>Jesucristo, Tayta Dyuspa Wamran kar, mana qischakaq karmapis kay pachaman shamur qischakaran. Chaynu qischakar imami intrakaran imanumi uk runa, Dyusta kasushanrayku qischakan nir. <sup>9</sup>Chaynu qischakarmapis Dyus munashankunata tantar rurashana karqami, wanuran nuqanchikkunata washamanallapapaq. Chayna payrayku Dyus nishanta kasuqkunapis, tukuy tyimpupaqna kawsanallapapaq. <sup>10</sup>Chaymi imanutaq unay Melquisedecmaqa Dyuspa kusa shumaq kuran kaq, chaynulla kananpaqmi Dyusqa Jesucristutapis akraran.

### Kriyishaykillapamantakish chiqanchakatkillapa

<sup>11</sup>Chay willashuyashayllapa chaypaq-qami, kusa achkaraq kan parlanapaqqa. Piru qamkuna mana das intrakaq

katkillapami mana imanupis willashuy-llapata puytinichu. <sup>12</sup>Qamkuna kriyishaykillapaqami unayna. Chaymi qamkunana ashwan yaçhachikuqkunaqa kankimanllapa. Piru Amitunchikpa shumaq rimaynintaqami, qashan manyaq willashunanllapata ministinki-llapa. Chaqa qamkunaqami mana yaqqadas intrakaqkunapaq tikrakashaykillapa. Nishaykillapa: Byiju runakunami tukuya mikuykunata puytin mikuyta, chaynulla imakunatapis riqsitya puytin ima. Piru uk taksha wamrituqami, lichilata upyan, chaynulla manaraq imalatapis riqsinchu. Chaynumi ashwan qamkunaqa, chay byiju runakuna yupay kanaykillapamantaqa, chay lichita upyaq wamritukuna yupay kankillapa.

<sup>13</sup>Chay nishushayllapanu, mayqanpis lichilata upyaqkunaqami, uk ñuñuq wamritu yupay. Chaynumi qamkunapis chay wamritukuna mana imatapis yaçhanllapachu chaykuna yupay karllapa, mana yaçhankillapachu imami allin, mana allin ruranaykillapapaq nirmapis. <sup>14</sup>Nataq tukuy mikuykuna-qami, byiju kaq runakunapaq. Chaqa paykunaqari ukkunata rikar willan imanu tukusha nirmapis. Chaynulla yaçhanllapa imami allin, mana allin nirmapis.

**6** <sup>1</sup>Chayraykumi ashwan byiju runakunana yupay kanallapapaq yarpushunllapa. Yaçhashanchikllapan chay punta kashanchiknu tukuy tyimpupaq wanunapaq chaykunataqa manana ruranapaqchu nir. Chaynulla Jesucristupaqmi yaçhakushanchikllapan imanu imanu paywan kashunllapa nirmapis. Piru chaynu katinmapismi, ama chaykunalatachu rurashunllapa. Ashwanmi Dyus masta intrachimanya-chik chaykunatapis, intrakarna kawsashunllapa. <sup>2</sup>Unayqami yaçhaku-shanchikllapapis imanumi shutikushun,

imanumi kriyiq masinchikkunapa ananman makinchikta churashun, imanumi kawsamuyashunllapa, imanumi maydiyaqa Amitunchik tukuyta rikar ya'chamayashunllapa nir ima. Piru amami chaykunalapaqqa yarpushunllapachu. <sup>3</sup>Ashwanmi unay ya'chakushanchikkunamantapis, Dyus masta ya'chachimayanchikllapa chaykunatapis pay nitin ya'chakupaq.

<sup>4</sup>Nishaykillapa: Wakinqami tutaparaqlapi yupay karanllapa. Chaymi Dyusqa intrachiran yarpuyinllapapiqa kusa shumaq achkillapi yupay kananllapapaq. Chaynulla Dyusmi shumaqta yanapar Santu Ispirituntapis quran. <sup>5</sup>Dyus nishankunata rurarmi, shumaqta taranllapapis. Chaynulla Dyuspa pudirminwanmi, maydiyaqa shumaqtana uk pachapiqa kawsananllapapaq karanllapa. <sup>6</sup>Chaynu kananllapapaqqami kusala shumaq kasha. Piru chaynu kananpaq kayarllapamapis, ashwan Jesucristumanta chiqanchakaranllapa. Chaymi chaynu tukurllapaqa, Dyuspi manana kriyinar, paymanqa manana qashan tikrakaytaqa puytiranllapanachu. Chayrayku, amami nuqanchikkunaqa chaynuqa kashunllapachu. Chaqa paykuna chaynu mana allinkunata rurar imaqa, Dyuspa Wamrampaqa burlakar qashan kruspi klabaq yupayna karanllapa. <sup>7</sup>Tukuymi imanutaq pachamaqa, tamya ishkimitin shuqr chakichin, chay yupay. Chayna trabajaq-kunapaq kusa shumaqta puqutingqami, Dyusqa shumaqta rikar bindisin. <sup>8</sup>Piru imanupi chay pachapi ayaq qirukuna puquting, manaqa kasha ima winatinqa, chay pachaqa mana sirbiyanqachu. Chaymi Dyusqa mana allinpaqchu rikayanqa. Chaynulla chaykunataqami rupachiyanqa.

<sup>9</sup>Piru chaynu rimarmapis kriyiq masiykuna, nuqakunaqa kunfyakanillapa qamkunaqa mana chaynuchi

kankillapa kanqa nir. Chaymi manana chaynu karqa, tukuy tyimpupaqna washakankillapa. <sup>10</sup>Chaqa Dyusqami kusa allinla kar, paypi kriyir ukkunata munar imanu yanapashaykillapata, imanu kanankaman rurayashaykillapatapis, manami qunqanqachu. Chaymi chaykunata rurarqa, kusa allin kaqkunatala rurankillapa. <sup>11</sup>Piru qamkunaqami uknikillapa uknikillapa chayllata imatapis ruranaykillapata munani. Chayna chayta rurarllapanqa ya'chayankillapana kanqa, maydiyaqa imata aipayankillapa kanqa chay, chaynulla imanu washakayankillapa kanqa chayqa, chiqapta kumplikayanqa nir. <sup>12</sup>Manami munamillapachu qilla kanaykillapataqa. Ashwanmi munamillapa, qamkunapis chay wakin kriyikuna kanankaman Dyuspi kriyir, payrayku shachinakurmapis arnishankunata shumaqta aypar kawsanllapa, chaynu kanaykillapata.

<sup>13</sup>Unaymi Dyus, Abrahamwan uk tratuta rurarqa, payllapaq juraran. Chaqa manari ima ukpis paymanta kusa mas puytiqqa karanchu. Chaymi mana ukpaqqqa juraranchu. <sup>14</sup>Kaynu nirmi juraran: "Nuqami kusata bindisishayki. Chaynulla nuqami qammanta kaq aylluykita kusata achkachashaq" nir.

<sup>15</sup>Chaynu Tayta Dyus, Abrahamata arnitinqami, payqa mana ukmanta yarpupakur imachu yarakuran. Chaymantaraqmí Tayta Dyus arnishantaqa, Abrahamqa rikaran. <sup>16</sup>Nishaykillapa: Runakuna imatapis rurananpaqqami juranllapa uk paymanta kusa mas puytiqqa shutinpi. Piru chaynu jurarqami, manana qashan qashanqa juranmannapischu. <sup>17</sup>Chaynu katinqa, Dyusqami allita intrachimanayaranchikllapa, mayqankunami chay tratuta rurashantataqa aypayanqa nir. Chaqa payqami arnimarninchik tratu rurashan-

mantaqa, mana pitilamatapis kambyar-chu qumashun. Chayraykumi payqa payllapaq jurar arnikuran, karanlata imatapis qumanallapapaq.<sup>18</sup>Chaynumi Dyus chay arnimashanchikmanta, chaynulla jurashanmantaqa, mana imapis kambyakaya puytinchu. Chaqa Dyusqami mana llullakuya puytinchu. Chaymi paymantaqa imatapis karanta aypayta puytinchik, tukuy paywan kar washakaqkunaqa. Chaynulla paypimi kunfyakanchik washamaqninchikllapa nir.

<sup>19</sup>Chaymi Jesucristupi kriyishanchik-llaparaykuqa kusalata kunfyakanchik-llapa imanutaq anklamaqa<sup>d</sup> barkuta mana dijanchu maylawta rinanpaq-mapis chaynumi pay yanapamashallapa mana chiqanchakashunllapachu nir. Chaynuqami Dyusta adurananllapa wasipi, Santu kwartuman yaykunapa punkunpi rakta račhpawarkuraq chaytaqa, pasayta puytinchikna paywan tarinakunapaqqa.<sup>20</sup>Chaynullami Jesucristuqa Santu kwartuman yaykuran nuqanchikkunapaq Dyusman mañakunanaqa. Chaqa payqami tukuy tyimpupaq mantakuq kuranchikllapan-a kar, Melquisedec yupayllana karan.

#### Melquisedecqami mas mantakuq kura karan

**7** <sup>1</sup>Kay Melquisedecqami, unayqa Salem pachapa mantakuqni kaq. Chaynulla payqami unaq syilupi Dyusninchikpa kuran kaq. Paymi, Abraham chay mantakuq kuntraqni-kunawan maqanakur binsisha tikrakamuyatin, rir tarir bindisiran Abraham-taqa. <sup>2</sup>Chaymanta Abrahamqa dyis

partin kaqmanta ukta quran, chay kuntraqninkunata ganar imankunata aypashanmantaqa. Nishaykillapapis: Chay shuti Melquisedecqami, rimayninchikpiqa munan niya “Kusa allita mantakuq” nir. Nataq Salem-shuypaqa rimayninchikpiqa munan niya “Shumaqchakuq” nir. Chaymi paypa pwiblun Salem kashanrayku, payqa “Shumaq mantakuq” kaqpis.<sup>3</sup>Piru manami yačhanchikchu Melquisedepaqa mayqanmi karan taytan, mayqanmi maman karan nirmapis. Chaynulla mana yačhanchikchu ima ayllumantami karan, imanumi nasiran, imanumi wanuran nirmapis. Chaynumapismi payqa, Dyuspa Wamran yupay tukuy tyimpupaq kurana.

<sup>4</sup>Kananqa rikayllapa imanumi Melquisedeqa karan nirmapis. Paytami unay rukunchik Abrahampapis dyis parti kaqmanta ukta quran, maqanakupi wakin mantakuqkunata ganar imankunata kitashanmanmatapis. <sup>5</sup>Dyus nitinmi Moisesqa kaynu nir mantakusha karan. Chaymi chay mantakuyqa niq: Runakunaqashi tukuy iman kaqkunamantaqa, dyis partimanta ukta qukuyanqallapa nir. Chaynulla niqpis: Levipa ayllunmanta kura kaqkunala aypanqallapa nir. Chaynutaqami, tukuy runakunamanta Abrahampaa ayllunmanta katinllapamapis aypaqlapa. <sup>6</sup>Piru Melquisedec mana Levipa ayllunmanta kasha katinmapis, Abrahamqami iman kaqmantaqa dyis partimanta ukta quran, Dyus michka payta imakunata arnisha katinmapis. Chaymantami Melquisedecpis, Abrahamta bindisiran. <sup>7</sup>Yačhashanchik-

**d 6.19** Anklaqami kusala llashaq jyirru manaqa kusala llashaq rumi. Chaymi sirbin yaku ruriman asintar allila aypakutin, barkuta ama wayra wakman kayman sunsunulla purichinapaq. Chaynumi nuqanchikkunapis Jesucristupi kriyishallapaqa, payqa uk ankla yupay purichimanchik munashanlatana rurar kawsanallapapaq.

llapanu, chay bindisiq chayqami, mas bindisikaq chaymantaqa. <sup>8</sup>Kay pachapi-qami Levipa ayllunmanta kura kaqkunala, chay dyis parti kaqmanta ukta aypanllapa. Piru maydiyaqami wanuyanqallapa. Nataq Dyus nitin iskribikashakunapiqami, Melquisedec-paqqpa riman, payqa kawsayanraq nir.

<sup>9-10</sup>Ya  hashanchikllapanu, Abrahammi Melquisedecman qimikatin bindisiran. Chaymi bindisishanrayku chay dyis parti iman kaqmanta ukta quran Melquisedectaqa. Chaynu qukutinqami chay paymanta ayllunkuna kananpaq kaq Levikunapis qukusha yupay kayaq, michka manaraq nasisha kayarmapis.

### Jesucristumi Melquisedec yupaylla kuraqa

<sup>11</sup>Levipa ayllunmanta kaq kurakuna-qami, Israel runakunata Dyus nitin, Mois  s mantakushankunata ya  chachiranllapa. Chaynu ya  chachitinllapamapis, manami uchanllapakunamanta washakayta puytiranllapachu runakunala kashanllaparayku. Chayray-kumi Jesucristo tukuya llakipar washamanallapapaq, kura Melquisedec yupaylla rikarimuran. Manami Aaronpa ayllunmanta kura yupaychu karan. Chaqa Levipa ayllunmanta kaq kurakuna washamanapaq kasha katinqami, Jesucristuqa mana mushuq kura kananpaq shamunantachu washamanallapapaqqa. <sup>12</sup>Jesucristumi shamurqa mushuq kuranchikllapa karna, Dyus nitin Mois  s mantakushankunata ya  chachimaranchikllapa. Chaymi chay mantakuykunamantaqa, Jesucristo ya  chachimashanchiktana kusa mas allita kasuypaqllapa. <sup>13</sup>Chay-nulla Amitunchikpa chay iskribishankunapi nishannulla, Jesucristuqami mana Levipa ayllunmantachu karan. Ashwanmi payqa uk ayllumanta

rikariran, kurakuna michka mana chay ayllumanta kasha katinmapis. <sup>14</sup>Chacha ya  hashanchikllapanu, Amitunchik Jesucristuqami Jud   shutiqpa ayllunmanta karan. Piru tukuy chaypaq-qami, Moisesqa mana imalatapis chay ayllupaqqpa rimaranchu, chay paymantami uk mushuq kura ima rikariyanqa nirmapis.

<sup>15</sup>Chayraykumi ya  chanchikllapa Jesucristo chay mushuq kura rikarimusha chayqami, Melquisedec yupaylla nir. <sup>16</sup>Chaynulla chay mushuq rikariq chayqami, mana mantakuykuna nishannulla Levipa ayllunmantachu karan. Chaqa payqami tukuy tyimpupaq manana wanunanpaq kar, ashwan kurana kananpaq numrakasha. <sup>17</sup>Chay-raykumi paypaq Dyusqa kaynu nin:

“Qammi tukuy tyimpupaq kura kanki,  
imanutaq Melquisedec kaq chaynulla” nir.

<sup>18</sup>Chaynu katinqami, chay unay mantakuykunaqa litala yupay kar, mana mayqantapis uchankunamanta kusa allinpaq tikrayta puytiranchu. <sup>19</sup>Chacha Mois  s mantakuyningqami mana imamantapis shumaqchamaqninchichu. Ashwan chay mantakuypa lugarningqami kan uk washakanapaqqa. Chaymi payrayku Dyusman qimikayta puytinchik.

<sup>20</sup>Kaypaqqami, Dyusqa jurar arnima-ranchikllapa. Nataq wakin kurakuna-qami mana jurar imachu numrakaranllapa. <sup>21</sup>Chacha Dyus nitin iskribikashakunapimi kaynu nin:

“Amitunchik jurarqami,  
pay nishantaqa mana kambyayta puytinchu.

Chaqa ninmi: ‘Qammi tukuy tyimpupaq kuraqa kanki, [imanutaq Melquisedec kaq chaynulla]’ nir”.

<sup>22</sup>Chaynu kananpaqmi Tayta Dyus juraran. Chaynami nuqanchikkunawan mushuq tratuta rurasha kar, Moisés mantakushanmanmatapis Jesucristo kura kashanrayku puytin kusa shumaqta yanapamayninchikta.

<sup>23</sup>Nataq wakin kurakunaqami kusa achka karllapamapis wanutinqa, paykunapa lugarninqa ukkunana kaqllapa. <sup>24</sup>Piru Jesucristo mana wanuq katinmi, pay kura kashanmantaqa, manana qashan ukman kuraqa kanqanachu. <sup>25</sup>Chayraykumi tukuy tyimpupaq Jesucristuna washayta puytin, mayqankuna Dyusman qimikaqkunataqa. Chaqa payqari tukuy tyimpupaq kawsan. Chayna Dyusman pay mañakunapanqaq qimikaqkunapaqqqa.

<sup>26</sup>Chayraykumi ministiyashanchik-kunapiqa Jesucristo yanapamanchik. Chaqa Jesucristu-ari kurakunapa chiqap mantaqninqa. Manami ima mana allintapis ruraranchu. Chaynu karmi uchayjun runakunawan kawsarmapis, payqa mana uchakuranchu. Chaymanta unaq sylipi Taytan kayashanmanpis ñchar, kusa mas riqsikashapaq tikrakan. <sup>27</sup>Manami chay wakin kurakunapa mantaqninkuna yupaychu. Chaqa wakinkunaqami waran waran uchakushanllapapaq animalta ufrinda nir wanuchinllapa. Puntataqami paykunapa uchankunapaqraq chaytaqa ruran. Nataq chaymantaraqmi wakin runakuna uchakushanllapapaqqa chayta ruranllapa. Piru Jesucristuqami, chay animalkunata ufrindapaq wanuchinllapa chaynu, paylla uk kutila wanuran uchanchikllapamanta washamanallapa-paqua. <sup>28</sup>Nataq Moisespa mantakuyninkunaqami, Dyusman mañakunapanqa kurakunapa mantaqnintaqa numraranllapa uchayjun runakunamanta. Chay mantakuykunamanta ikitaraq, Dyusqa jurar Wamrantaqna numraran paypa

rimaqnin kurakunapa mantaqnin kananpaqqa. Chaqa payqari tukuy tyimpupaq kusa allinla kar mana uchayjun imalamapischu.

### Jesucristumi mushuq tratuta ruraq chayqa

**8** <sup>1</sup>Chiqaptaqami chay parlayashan-chikllapa chaypaqqa, yañanchik chiqapta kan uk kusa allita Dyuspaq willamaqningchik kura nir. Payqami, Dyus sylipi mantakuyashan allilaw qichqanpi tasha. <sup>2</sup>Chaymi chay maypiñchi Dyus kashanpi, payqa kusa allin rimaqnin kurakunapa mantaqnin kar sribikun. Chaqa chay chiqap tanan lugartaqari paylla Amitunchikqa rurasha, mana runakunachu.

<sup>3</sup>Dyuspaq tukuy kurakunapa mantaqnintaqami, numranllapa ufrindakunata ñjurur animalkunata wanuchinanllapalaqa. Chayraykumi Jesucristo kurakunapa mantaqninna karmapis, ufrindapaq imalataqa wanuchiq yupay, Tayta Dyusta qunanpaq karan wanurqa. <sup>4</sup>Pay kay pachapi karqami, mana Levipa ayllunmanta kaq kurachu kanman. Chaqa kay pachapiqari imanutaq Moisespa mantakuynin niran chaynulla, kurakunaqa kan ufrindakunata ñjururanllapalaqa. <sup>5</sup>Nataq Jesucristuqami, unaq sylipi Dyusta adurananllapa wasipi tasha sribikuyan. Chaynu katinqami, kay pachapi kurakuna sribikur adurananllapa wasiqa, intrachimanalapaq imanumi unaq sylupipis Dyusta adurananllapa wasipiqa sribikun, nir. Chaqa Dyusqami, Moisestaqa willaran payta adurananllapa tuldu wasitaqa rurananpaq kaynu nir: “Allitami intrakanki: Imanutaq chay sirkamanta willar rikachishuray, chaynullatami chay tuldu wasitaqa ruranki” nir. <sup>6</sup>Nataq Dyuspaq kusa allin kuranchik Jesucristuqami, chay

kurakuna rurananmantaq a kusa mas shumaqta imatapis ruran. Chaqa kusala shumaq tratuta rurarmi, Dyuswan runakunataqa pullachasha. Chaynulla kusala shumaq imakunatari arnikushamapis.

<sup>7</sup>Piru Israel runakunawan tratuta rurashanllapakuna, kusa allin tratu kasha katinqa, manami allinchu kananta qashan uk tratuta rurananllapa-paqqa. <sup>8</sup>Piru chay runakuna mana allinkunata ruraqta rikarqa, Tayta Dyusqa kaynu niran:

“Uk diyami kanqa, Israel runakunawan, Judá runakunawanpis uk mushuq tratuta ruranaypaq.

<sup>9</sup> Kay mushuq tratuta rurayani chayqami, mana chayllachu kanqa, chay unay rukunkunawan tratuta rurashaywanqa.

Piru nuqa michka makinmanta aysakuq yupay chay Egipto pachamanta lluqshichimusha katympasis, chay tratu rurashaykunata mana kasutinmi paykunalata dijaray.

<sup>10</sup> Piru Israel runakunawan kay mushuq tratuta rurayani chaymanta unaykaqmantaqa, kaynumi kanqa nini: Nuqami mantakuyniykunata yarpuyinpi churashaq, chaynulla iskribishaq shunquunkunapi, nuqata kasumar kawsananllapapaq. Chayna nuqami Dyusnin kashaq. Chaynulla paykunaqami wamray-kunana kanqa.

<sup>11</sup> Chaymi manana mayqanpis ayllunllapakunata, runa masinllapakunamatapis ninqallapanachu: ‘Amitunchikta riqsiyllapa’ nirqa.

Chaqa tukuymiri riqsimanqallapa mana kwintachaypaqla kaqkuna, chaynulla chay kusa runa nishakunamapis.

<sup>12</sup> Nuqami chay mana allinta rurar uchakushanmantaq a pirdunasshaq.

Chaynami, manana masqa yarpushaqnachu uchanllapakunapaqqqa”.

Chaynumi niran Dyusqa. <sup>13</sup>Nishaykillapa: Dyus chay mushuq tratupaq rimarqa, chay punta tratu chaytaqa ikipina dijasha. Chaynulla chay ikipi kasha chaytaqa, manana ruraypaqna-chu. Chaqa chayqami manana maychu chinqananaqqqa.

Jesucristumi mas shumaqta pullachamanchik Dyuswanqa

**9** <sup>1</sup>Kananqa nishaykillapa: Chay punta tratuta ruratinllapaqami, kaq mantakuykuna Dyusta imanu sirbinanllapapaqmapis. Tukuy chaykunataqami ruraqlapa kay pachapi, Dyusta adurananllapa wasipi. <sup>2</sup>Dyusta adurananllapa tuldu wasipiqami kaynu karan: Chay punta yaykuna Santu kwartupiqami kayaq bilakunata shachinanllapapaq biliru, chaynulla uk misa. Chaypa ananpimi Dyuspa kaq tutillankuna karan. <sup>3</sup>Chay kwartullapimi uk kusala rakta raçhpap warkuraq. Chaypa ikinpiqa karan Kusala Santo Lugar ninllapa chay. <sup>4</sup>Chaypimi insinsyuta quntachikunallapapaq urumanta rurakasha altar karan. Chaynulla chaypiqa karan chay tratuta rurashanllapa, churakunallapa kajun kufri shutiq. Chayqami tukuy ladunta uruhan rurakasha karan. Chay tratuta rurashanllapa kufripaqami Aaronpa bastunnin qawasha karan chay karan. Chaynullami urumanta rurakasha uk jarrapi “maná” shutiq mikuy karan.

Chaypiqapismi Israel runakunawan tratuta rurashan ishkay tablalla rumikuna karan. Chaqa chay tablalla rumikunapimi, imakunata rurananllapa-paq tratuta rurar, chay dyis mantakuy-kunata Dyus iskribishan karan. <sup>5</sup>Chay tratuta rurashanllapa kufripa ananpi-qami, ishkay ángel kirubin shutiq alayjun kaq chaypa ritratun karan. Chay angelkunaqami intrachimanchik Dyus chaypi nir. Chaynulla chaykunaqami alanwanqa pampayaran, chay uchanllapamanta pirdunaqlapa kufripa kirpananta. Piru kananqami tukuy chaykunapaqqa mana manyaqqa rimaypaqnachu.

<sup>6</sup>Chaynu tukuy imakuna kamakashana katinqa, kurakunaqa waran waran yaykuqlapa Dyusta adurananllapa wasimanqa. Piru chaynu yaykurllapapismi chay punta kwartulaman Dyuspaq ima rurananllapakunata rurananllapapaqqqa yaykuqlapa. <sup>7</sup>Chay kwartupa ikinlawnpi Kusala Santu Lugar kaq, chaymanqa kurakunapa mantaqnila yaykuq, añupaqqqa uk kutila. Piru yaykunapaqqami, animalpa yawarninta apaq uchaymanta pirdunamay ninanpaq. Chaynulla chayllapimi wakin runakuna mana kwintata qukar uchakushanpaqpis chayllata ruraq. <sup>8</sup>Tukuy chaykunawan-qami Santu Ispirituqa intrachimanchik, chay punta tratullawan karllaraqqashi, Kusala Santu Lugar Dyus tayashan-manqa mana tukuyqa yaykuya puytingallaparaqchu nir. <sup>9</sup>Tukuy kaykunaqami intrachimanchikllapa, ufrindata churar animalkunata wanuchir, Dyusta adurashallapamapis chayqa mana yarpuyinchikllapamapis mas allinpaqqqa tikramayashunllapachu nir. <sup>10</sup>Chaqa tukuy chaykunaqa mikuya, upyananpaq ima chaykunala. Chaynulla limpyu kashaq ninapaq

kustumrila ima. Tukuy chaykunaqami, Dyus tukuy imata kambyanankaman mantakuykunalari karan.

<sup>11</sup>Piru Jesucristuqami shamushana. Kananqami payna Dyuspa kusa allin kurakunapa mantaqnin kuraqa, kay tiimpupi tukuy imamanta shumaqchamaqninchikqa. Chay kurapa mantaqnin unaq sylipi Dyus kayashan Santu lugarman yaykushanqami, kusa mas shumaq mas allin ima. Chaynulla chaytaqami mana runakunachu rurasha. <sup>12</sup>Jesucristumi mana chibupa, bisirrupa yawarninta iêharchu, yaykuran Dyus kayashan Kusala Santu Lugarmanqa. Ashwan payllami kruspi wanur yawarninta iêharan. Chaynulla uk kutilami tukuy tiimpupaq Kusala Santu Lugarmanqa yaykuran. Chayna nuqanchikkunata tukuy tiimpupaq washamanallapapaq. <sup>13</sup>Chiqaptaqami chay turukunapa, chibukunapa yawarnin, chaynulla chay bisirrukunata altarpi rupachishanpa uêhpanta runakunapa ananman iêhanllapa chayqa, sirbin runakunata shumaqchanaqqpaq waqtanlawlata.

<sup>14</sup>Piru kay chaynu katinqa, ¡kusa mas pudirniyjun kanqa Jesucristupa yawarninqa! Chaqa payqa michka mana uchayjun karmapis, Santu Ispiritu yanapatinmi Tayta Dyuspa naypanpi wanuran. Chaynu wanurmi, chay tukuy tiimpupaq ucha kaqkunapaqqqa pagrakuran. Chaynulla, chay yawarnin-nami shumaqchamanchik chay mana allinkunata yarpur rurar wanunamantaqa. Chaynu karnaqa, tukuy tiimpupaqna kawsaq Dyusta sribina-paq.

<sup>15</sup>Chayraykumi Jesucristuqa wanuran-mapis, nuqanchikkunata Dyuswan pullachamanallapapaq. Chayna mushuq tratuta ruraran, chay punta tratuta rurashanpi uchakusha kashamapis,

uchanchikkunamanta pirdunamana-llapapaq. Chaynami Dyus tukuyta akrashankunaqa, pay tukuy tyimpupaq imata arnishantaqa aypantanllapapaq. <sup>16</sup>Chayna chay tratuta rurashan kumplikananpaq, tukuy chaykunapaq yačhanapaqqami, puntataqa wanuyanqa tratuta rurasha chay. <sup>17</sup>Chaqqa uk tratu rurakashaqami mana sirbinchu, tratuta rurasha chay kawsayatinraffa. Piru chayqami sirbin tratuta rurasha chay wanushana katin. <sup>18</sup>Chayraykumi chay punta tratuta rurashanpaqpis, animalpa yawarminkunata ičhaqlapa. <sup>19</sup>Moisesmi tukuy mantakuykunata willar quran, tukuyla runakunata. Chaymanta chupika millwata, isupu shutiq yurata aypar, bisirrupa, chibupa yawarninwan yakuta pičhur, chay iskribikashakunapa ananman ičhaq. Chaynulla ičhaqpis tukuyla runakunaman. <sup>20</sup>Chaynu ičhaqnumi kaynu niran: "Kaymi chay yawar, Dyus tratuta qamkunawan rurashanqa" nir. <sup>21</sup>Moisesmi chay yawarkunawan salaran Dyusta adurananllapa tuldu wasitapis. Chaynulla Dyusta payji ninanllapapaq ima kaqkunatapis yawarwan salaran. <sup>22</sup>Mantakuykuna nishannuqami, uk yawarninta ičhar wanuq uchanllapakunamanta shumaqchakananpaqqa. Chayna yaqqa tukuy imatapis yawarwan shumaqchaqlapa. Chaymi yawar mana ičhakatinqa, mana mayqantapis Dyusqa uchankunamanmapis pirdunar washaqchu.

**Jesucristumi uk kutila wanuran  
uchanchikkunata ashuchinanpaq**

<sup>23</sup>Chiqaptaqami tukuy chay animalkunata wanuchir imaqqa, Dyusta adurananllapa wasipi kaqkunata shumaqchananllapapaq rurarmapis, unaq sylipi kaqkunamantaqa, yaqqa chaynuta yupayla rurayanllapa. Piru

unaq sylipi kaqkunaqa, animalkunata wanuchinamantaqa kusa mas shumaqta munayan. <sup>24</sup>Chaqqa Jesucristuqami mana yaykuranchu chay runakuna rurashan Santu kwartumanqa. Chaynulla Santu kwartu rurashanllapapaq, unaq sylipi Santu kwartu yupaylla karan. Chaynu katinmi Jesucristuqa ashwan syluman yaykusha. Chayna kananqa Dyuspa naypanpi nuqanchikkunaryku mañakunanpaq. <sup>25</sup>Manami ayka kuti imachu wanur yaykuran nuqanchikkunata washamanapaqqa, imanataq kurakunapa mantaqnin chay Kusala Santu Lugarman aňu aňu uk kutila yaykuq chaynuqa. Piru chaynu yaykurmapis ukpa yawarnintari ičhaq. <sup>26</sup>Chaynu kananpaq kasha katinqa, Jesucristuqa ayka kuti dijur wanunanta, tukuy ima rurakashanmanta-pachaqa. Piru kananqami chay tukukanan tyimpushipchamutinqa, Jesucristuqa rikarimusha uk kutila paylla wanur tukuy tyimpupaqna uchanchikkunamanta pirdunamanallapapaq. <sup>27</sup>Mayqanpismi uk kutila wanun. Chaymantaraqmimi imanu kashanpaqpis rikar yačhananllapapaq tyimpuaqna kanqa. <sup>28</sup>Chaynumi Jesucristupis uk kutila wanusha achka runakuna uchankunamanta washakanllapapaq. Chaymantaraqmimi qashan ishkay kutipaq shamuyanqa, manana qashan wanur tukuyta uchanllapakunamanta washanampaqnachu. Ashwanmi shamunqa payta kasur yaraq chaykunata pullakunanaqna.

**10** <sup>1</sup>Chaqqa Moisespa mantakuyinin-kunaqami, intrachimanalapaq karan chay mushuq tratu kananpaq karan chaypaq. Manami chiqap chay kusa shumaq imachu karan. Chaymi Moisés mantakushanqa, mana mayqantapis chiqaptta shumaqchayta puytiran-chu, michka kada aňu Dyusman qimikatinllapamapis. <sup>2</sup>Piru chay mantakuy-

kuna chiqapta uchanllapamanta shumaqchakuq kasha katinqa, manami mayqanpis uchanpaq yarpur, ufrindapaq êhurar animalkunata wanuchinanllapatanachu.<sup>3</sup> Piru ashwan kaykuntaqa kada aña ruraranllapa, kusa uchayjun kani nir yarpunanllapalapaq.<sup>4</sup> Chaqa turukunapa, chibukunapa yawarninqa, manami uchakunamanta shumaqchakuya puytiranchu.

<sup>5</sup> Chayraykumi Jesucristuqa, kay pachaman shamur Dyustaqa kaynu niran:

“Manami imata wanuchinayta, ima ufrindamatapis munankichu. Ashwanmi uk kwirputa qumashayki.

<sup>6</sup> Manami imata rupachir, ima ufrindamatapis munankichu uchanllapamanta pirdunanaykipaqqa.

<sup>7</sup> Chaymi niray:  
‘Kaypimi kani, imanutaq iskribi-kashakunapi nin nuqapaq chaynulla.

Qam munashaykita ruranaypaq Dyusniy’.

<sup>8</sup> Puntataqami nin: “Manami imata rupachir, ima ufrindamatapis munankichu uchanllapamanta pirdunanaykipaqqa” nir. Piru chaykunata rurayarqami, chay mantakuykuna nishannullaraq rurayankillapa.<sup>9</sup> Chaymantaqami ninpis: “Kaypimi kani munashaykita ruranaypaq” nir. Chaynu nirqami niyan, chay unay rurayashanllapa chaykunataqa ashuchinampaq. Chaynu ashuchirnaqami, uk mushuqta chaypa lugarninqa êhurananpaq.<sup>10</sup> Dyusmi uchanchikmanta shumaqchamashanchik, Jesucristo, Dyus munashannullata rurasha katin. Chaqa Dyus munashannuri Jesucristuqa uk kutila paylla wanuran tukuy tyimpupaq.

<sup>11</sup> Tukuymi Israelmanta kaq kurakunaqa, waran waran, chaynulla

ayka kuti ima chayllata ruran, chay unay rurayashanllapanulla animal-kunata wanuchir ima, Dyus uchanllapakunamanta washananllapapaq nir. Piru tukuy chaykunaqami mana uchakunamanta pirdunakuya puytinchu.<sup>12</sup> Piru Jesucristuqami paylla uk kutila wanuran, tukuy tyimpupaq uchanchikillapamanta pirdunamanallapapaq. Chaymantami Dyuspa allilaw qichqanpi taran.<sup>13</sup> Chaypimi payqa yarakuyan, Dyusninchik êhiqniqninkunata êhakinpa êhakinman êhuratin binsinankaman.

<sup>14</sup> Chaqa uk kutila wanurmi, tukuy tyimpupaq shumaqcharan chay mayqan chi Dyuspaq shumaqchakananpaq karan chaykunataqa.<sup>15</sup> Chaykunapaqmi Santu Isiprituqa kaynu nirqa nimanchik:

<sup>16</sup> “Chay tratuta paykunawan rurayashaq chaymanta unaykaqmantaqa, kaynumi kanqa nin Amituykilapaqa:

Mantakuuniykunatami shunqunpi êhurashaq.

Chaynulla yarpuyinipi iskribishaq, nuqata kasumar kawsananllapapaq.

<sup>17</sup> Chaynami, manana yarpushaqchu uchan-kunapaq, chay mana allinta rurashankunapaqpis” nir.

<sup>18</sup> Chaynumi Jesucristo uchanchikkunamanta pirdunamanallapapaq uk kutila wanushana katinqa, mananami allinchu qashan uchanchikkunamanta pirdunamanapaq ufrindata êhuranallapapaqqa.

**Kriyishanchiknulla shachinakur ama chiqanchakashunllapachu**

<sup>19</sup> Chayraykumi kriyiq masiykuna, kananqa nuqanchikkunaqa kusa allin Dyus tayashan Kusala Santo Lugarmanqa yaykuya puytinchikllapa,

mana imamantapis manchakurchu. Chaqa Jesucristumi nuqanchikkunaryku yawarninmatapis iêhasha. <sup>20</sup>Chayna chay mushuq nan bidanchikta qumanchik chaytaqami, Amitunchik kiçhasha chay warkuraq rakta râchpata llkir. Chaynu nirqami Amitunchikpa kwirpunllapaq niyanchik. <sup>21</sup>Jesucristumi Dyuswan pullachamaqninchik kar, Dyuspi tukuy kriyiqkunapaqa mas mantaqnin kurana payqa. <sup>22</sup>Chayraykumi tukuy shunqunchikwan allita yarpukur Dyusmanqa qimikashunllapa, allita paylapi kriyir ima. Chayna shunqunchikpimapis allinkunata yarpur, amana ima mana allinkunata yarpur imachu, kwirpunchikta kusa chuyala yakuwan paqasha yupayna kar qimikashunllapa. <sup>23</sup>Maydiyapismi Dyuslapi allita kunfyakar, kriyishanchikmantaqa ama chiqanchakashunchu. Chaqa Dyusmi maydiyapis pullanchik kar arnimashanchiktaqa kumplimashun. <sup>24</sup>Imanupismi ukniinchikllapa ukniinchikllapa animachinakur yanapanakuyta kamashunllapa. Chaynulla ama ima mana allintapis rurarchu llakipanakur ima kawsashunllapa. <sup>25</sup>Amami Amitunchikman tantakar mañakunllapa chaykunamanqa faltashunllapachu, imanutaq wakinkuna chaynu ruranllapa chaykuna yupayqa. Ashwanmi ukniinchikllapa ukniinchikllapa animachinakushunllapa. Chaqa Amitunchik shamananpaq diyaqami chaymuyanna.

<sup>26</sup>Jesucristo uchanchikkunamanta washamanapaq wanusha nir yaçhayar, munashanchiklatana rurar uchakushqa, ¿mayqanna uchanchikkunamantaqa shumaqchamashun? Chaqa Jesucristuqa manana qashanqa wanuyanqachu washamanapaqqa. <sup>27</sup>Ashwanmi chayta rurashaqa, maydiya imanu kanchik nir yaçhamarninchikqa Dyusqa allipla

manchaypaqtana kastigar, kusala ratakuq ninamanna itakumashunllapa. Chaqa chaynumi Dyusqa payta ñiqniq-kunataqa tukchinqa. <sup>28</sup>Mayqanpis Moisespa mantakuyinmanta chiqanchakasha katin, ishkay manaqa kimsa tistigukuna paypa kuntran rimatinqa, chay runataqa mana llakiparnachu wanuchiqlap. <sup>29</sup>Chaynu katinqa, ¿manachu qamkunaqa kriyinkillapa, chay mayqanpis Dyuspa Wamranta mana kasuqkunataqa mana kastigayanqachu Dyusqa nir? ¿Chaynulla manachu yarpunkillapa Dyuspa Wamrampa yawarnin içhakashata mana kasuqkunata, Dyuspa llakipakuq Ispiritunta musyar mana munaqkunataqa masta kastigayanqa nir? Chaqa chay yawarwanmi mushuq tratuta rurasha. Chaynulla chay yawarwanmi Dyusqa paypaqna kanapaq tikramashanchik ima. <sup>30</sup>Chaqa Amitunchikqami kaynu niran:

“Nuqami chay mana allinta rurarchakuqkunataqa allita rikar yaçhar kastigashaq”.

Chaynullami niranpis:

“Amitunchikmi paypa kaqninkuntapis allita rikar yaçhanqa” nir.

<sup>31</sup>¡Kusa manchaypaq-ari kanqa kawsaq Dyuspa naypanpi ima mana allinkunata rurashanchikpaq rikar yaçhamashaqa!

<sup>32</sup>Piru qamkuna yarpuyllapa, imanumi unay puntata Amitunchikpi chayraq kriyirqa qischakar ima shachinakuq ima kankillapa. <sup>33</sup>Qamkunamanta wakin tami musyashuqlap. Wakinkunataqami tukuya naypanpi kusata qischashuqlap. Nataq wakin-shuypaq chaynu qischakaq-kunapa pullanmi qischakaraykillapa.

<sup>34</sup>Qamkunamita chay karsilkunapi kaqkunapaq llakiraykillapa. Chaynulla

imaykillapata kitashutinllapamapis, aligriyaraykillapa. Chaynuqami karaykillapa sylupi ima kaqkunata aypayankillapa nir yačhar. Chaqa tukuy chaykunaqami mana tukukanayjunchu.

<sup>35</sup>Chayrayku chay kunfyakayashaykillapataqa amami chinqachinkillapachu. Chaqa maydiyaqami ima rurashaykillapapaqqqa, imatapis karanta aypankillapa.

<sup>36</sup>Qamkunami ama imapaq yarpupakur imachu shachinakur, Dyus munashankunalata rurankillapa. Chayna pay arnishushanllapataqa aypanaykillapapaq.

<sup>37</sup>Chaqa iskribikashakunapimi kaynu nin:

“Kusa shipcha shipchanami chay shamunanpaq kaq shamunanpaqqa.

Manami tardanqanachu.

<sup>38</sup>Mayqanpis allita kriyishanraykulami, kusa allinpaq riqsikar kawsanqa. Piru chay unay kashannulla tikrakatinqa, manami paywanqa aligrichu kashaq” nir.

<sup>39</sup>Nuqanchikkunaqami, mana chay wakinkuna yupay unay kashanman tikrakar, paykunalla kastigakaran chaykuna yupaychu kanchikllapa. Piru nuqanchikkuna kriyirla paypi kunfyakaqkunaqa, washakashunllapa.

### Kriyishanchik

**11** <sup>1</sup>Dyus arnimashanchikta michka mana rikasha karmapis, allita kriyishanchikrayku, chiqapta aypayashun nir kunfyakanchik.

<sup>2</sup>Chaynulla kriyir kunfyakashanpaq yačharmi, Dyusqa unay rukunchikkunataqa kusa shumaqta rikaran.

<sup>3</sup>Kriyishanchikllapanu yačhanchikllapa, Dyusmi imatapis rurayta puytiq kar, rimayninlawan syluta, pachata, chaynulla tukuy ima kaqkunatapis

ruraran nir. Chaymi kanan rikayashanchikkunaqa, rurakaran mana rikayta puytiyashanchikkunamanta.

<sup>4</sup>Kriyishanraykumi Abelqa, Dyusta payji ninanpaqqqa, kusa shumaq uyshitanta wanuchir payjichikuran, kusa mas shumaqta uknin Caín payjichi-kushanmantqa. Chaymi Dyusqa kusa allin runapaq riqsir, chay ufrindakunapaqqa shumaqta yarpuran. Chaymi Abelqa wanusha katinmapis, yačhanchik imanumi kusata kriyiran nir.

<sup>5</sup>Kriyishanraykumi Enoctaqa kawsaq-llata Dyusqa aparan. Chaymi mana wanusha katinmapis, manana tariranllapachu. Chaqa Dyusmi apasha karan. Chaynulla Enocpaqqqa kaynu niqllapa: Dyus manaraq apayatinqashi, Enocqa Dyustaqqa kusa shumaqta yarpuchiran nir.

<sup>6</sup>Piru manami allinchu Dyuspi mana kriyir, mana shumaqta yarpuchinapaqqa. Chaqa Dyuswan pullachakasha kanapaqqa, kriyipaq Dyusqa kan nir. Chaynulla payta maskaqunataqa, kusa shumaq imakunatami quyanqa nir kriyipaq.

<sup>7</sup>Kriyishanraykumi Noeta, Dyusqa willaran imami pasayanqa nirmapis. Chaymi payqa kriyir kasur, uk wampuq wasita ruraran ayllunwan pulla washakananpaq. Chaynulla Noeqa kriyiq karmi, tukuy runakunata dijatin wanuranylpa. Nataq pay-shuypaqa Dyuspi kriyishanrayku, shumaqpaq riqsikar washakaran.

<sup>8</sup>Kriyishanraykumi Abrahamta, Dyus qayatinqa, payqa kasur lluqshir riran mayqan pachatachi Dyus irinsyanpaq arnisha karan chayman. Payqami tayashanmantqa riran, mana mayman riyaní nir yačharmapischu.

<sup>9</sup>Paymi kriyishanrayku furastiru yupay kawsaran Dyus arnishan pachapiqa. Piru chaypiqami tuldumanta rurakasha wasipi taran. Chaqa Dyus arnishankuna-

piri allita kriyiran. Chaynullami wamran Isaacwan, willkan Jacobpis taranllapa. <sup>10</sup>Chaynumi Abrahamqa taran. Chaqa payqami kriyir Dyuspaqqqa yarpukuran pay kayashanman apayanqa nir. Chaqa Dyus kayashan kusa shumaq lugartaqami, mana mayqan runa llutakuqpischu rurasha. Ashwan chaytaqami pay paylla Dyusqa rurasha.

<sup>11</sup>Kriyishanraykumi Abraham michka rukulana kar, warmin Sara mana wamrakuq katinmapis, Dyus nitin payqa wamrayjunna tikrakaran. Chaqa payqami kriyiran Dyus arnishantaqa kumpliyanqa nir. <sup>12</sup>Chaymi Abrahamqa michka wanunanaqna kayarmapis, unaq syilipi qullarkuna yupay kusala achka aylluyunpaq tikrakaran. Chaynulla ayllunqami imanutaq mar manyapi aqu kaqmataqa mana yupaya puytinchikchu, chaynu karan.

<sup>13</sup>Tukuy kay runakunami wanurallapa, Dyus arnishankunataqa mana ayparlampischu. Piru Dyuspi kriyishanlaparaykumi arnimashanllapakunaqa maydiyapis kumplikayanqa nir, kusa aligrita yarpuranllapa. Chaymi paykunalla kwintata qukarannllapa, nuqanchikkunaqa kay pachapiqa furastirukuna yupay kanchikllapa nir. <sup>14</sup>Piru chaynuta rimarqami, intrachimanchikllapa paykunaqa uk pachata maskayaranylparaq tukuy tyimpupaq kawsar tananllapapaq nir. <sup>15</sup>Nataq chay pachanllapamanta yarqushan chaypaq yarpuyarllapaqa, chay pachanllapallaman qashan tikrakanllapata. <sup>16</sup>Piru paykunaqami uk kusala shumaq pachata maskayaranylparaq chayta. Chayraykumi Dyusqa mana pinqakunchu paykunapa Dyusmin kani niytaqa. Chaqa Dyusqamiri tanan pachapiqa, kusala shumaq wasikunata ima kamkachisha paykunapaqqa.

<sup>17-18</sup>Chaymantami Tayta Dyusqa, Abrahamqachu allita payta kasuyanqa nir yačhanar, willaran wamran Isaacta ufrindapaq nir wanuchinanpaq. Chaynulla Dyus, Isaacrayku kusa achka aylluyun kanki nisha katinmapis, Abrahamqami mana kwashayaranchu uklayla wamranta wanuchinanpaqmapis. <sup>19</sup>Chaqa Abrahamqami kriyiq, wanushakunamatapis Dyusqa qashan kawsachimun nir. Chaymi wamranta wanuchinanpaqna katinqa, kriyishanrayku Dyusqa mana chayta rurananta munaranchu. Chaynuqami intrachimanchik, Isaacqa wanushana yupay karmapis kawsamushana nir.

<sup>20</sup>Kriyishanraykumi Isaacqa, Jacobwan Esauta bindisiran maydiyaqa imanu kananllapapaq nirmapis.

<sup>21</sup>Kriyishanraykumi Jacobqa wanunanaqna karqa, Josipa wamrunkunata ukninta ukninta bindisiran. Chaynulla bastunsitunwan pachalaman sintikurmi Dyusta aduraran.

<sup>22</sup>Kriyishanraykumi José manaraq wanuyarqa, Israelmanta runakunaqashi maydiyaqa Egipto pachamanta yarqur, Dyus arnisan pachaman rianqallapa nir yačharanllana. Chaymi wakin ayllunkunataqa willaran, rirllapaqa paypa tullunkunamatapis apananllapapaq.

<sup>23</sup>Kriyishanraykumi Moisespa taytakunaqa, Moisés nasitinga kimsa misista pakarla kawsachiran. Chaqa kusala shumaq nasquy wamrituri karan. Chaynulla chay pachapi mantakuq tukuy ullqu wamritukunata wanuchinanllapapaq mantakutinmapis, manami manchakuranllapachu.

<sup>24</sup>Chaynulla kriyishanraykumi Moisés byiju runana karqa, mantakuq Faraonpa warmi wamrampa wamran nikaytaqa mana munaranchu. <sup>25</sup>Ashwanmi payqa, Dyus akrashan runakunawan pulla

qischakayta munaran. Chaynulla uk ratulapaq aligriyar ama uchayjun ima kananpaqqami, mana imatapis munay-ninllamantaqa ruraranchu.<sup>26</sup> Piru payqami ashwan yačharan, maydiyaqa Dyusqa chay runakunamanta uk washakuqa kačhamuyanqa nir. Chaymi chay Egiptupa iman kaqkunamatapis dijarna, ashwan qischakaymatapis munaran. Chaqa payqari allita yarpuran maydiyaqa Dyus arnishanqa chiqapta kumplikayanqa nir.

<sup>27</sup>Kriyishanraykumi Moisesqa imatapis karanlata rurarc Egipto pachamanta yarquran, chay mantakuq piňakuyashanmanmatapis mana manchakurchu. Chaqa Dyusta mana rikarmapis, paypi kriyiran yanapayan nir.<sup>28</sup>Kriyishanraykumi Moisesqa, Pascua fyistata ruraran. Chaymanta kačhakuran punkunllapata yawarwan salananllapapaq. Chayna Tayta Dyuspa angelnin shamurqa, Israel runakunapa kulaka ullqu wamranllapataqa ama wanuchinanpaqchu.

<sup>29</sup>Kriyishanraykumi Israel runakunaqa, chay chupika marpa čhaypinta pasaran chaki pachata yupay. Chaymanta Egiptumanta kaqkunapis chayllata pasashaq nir, ēhuqar wanuranllapa.

<sup>30</sup>Kriyishanraykumi Jericó pwiblupa ridurninpi adubiwan llutakasha pata kaq chaykunaqa limpu rataranllapa. Chayqami Israelmanta kaqkuna ridurninllapapi syiti diyata marchar ima purishallapa katinna rataran. <sup>31</sup>Chaynulla kriyishanraykumi, chay ukwan ukwan punuq warmi Rahab shutiqqa, mana pullanllapachu wanuran Jericó pwiblunllamanta mana kasukuqkunawanqa. Chaqa payqari Israel runakuna uklaw pachapi riparakur puriq chaykunataqa, shumaqta samachisha karan.

<sup>32</sup>¿Imatana masqa nishaq? Tyimpumi faltamayanqa rimanaypaq Gedeonpaq, Baracpaq, Sansonpaq, Jeftipaq, Davidpaq, Samuelpaq, Dyuspa wakin rimaqninkunapaq imamapis. <sup>33</sup>Tukuy paykunapismi kriyishanllaparayku, čhiqniqinllapapa tayashan pwiblunkunaman yakkuranllapa. Ukkunata rikaranllapa jwiskuna yupay, Dyus arnishanmatapis ayparanllapa, liyunkuna mikunanllapamantapismi washakaranllapa ima. <sup>34</sup>Kusala nina ratakuqpimapis mana ruparanllapachu. Wakinqa ispadakunallawan wanunampaq karmapis washakaranllapa. Wakinqami mana jwirsayjun karmapis kusa jwirsayjun tikrakaranllapa. Kusala jwirsayjun karmi, guerrapimapis uklawmanta kuntraqnin suldadukunamatapis binsiranllapa. <sup>35</sup>Wakin warmikunapa ayllunllapa wanusha katinmapis, Dyus kawsachimutin kawsaqtana pullakuranllapa. Wakinkunatami qischatinllapa llakir mana washakayta munar ima, wanuranllapa maydiyaqa kusa shumaqtana kawsamurqa tayanqallapa nir. <sup>36</sup>Ukkunami burlatinllapa, wipyatinllapa, kadinakunawan watatinllapa, prisutinllapa ima qischataranllapa. <sup>37</sup>Wakinkunami rumillawan sitatinllapa wanuran. Wakinkunatami sirruchuwaničhaypinnanta pititinllapa ima wanuranllapa. Ukkunaqami ispadallawan wanuranllapa. Ukkunaqami uklawmanta uklawman puriranllapa, uyshitapa, chibupa qaranta yakakushala, mana imayjunkuna yupay. Chaynumi llakir ima qischataranllapa. <sup>38</sup>Chaynu chay mana kriyikuna ruratinllapa, michka kay pachapi mana tananllapapaq karmapis, chunllaq lugarkunapi, qaqakunapi, mačhay-kunapi, pacha učhkukunapi ima taranllapa.

<sup>39</sup>Chaynu katinllapami, paykunataqa Dyusqa nuqapi allita kriyishaykillapa niran. Piru chaynu nisha katinmapis kay pachapi karllaraqqa, manami mayqan-ninllapapis tukuytaqa Dyus arnishan chaytaqa ayparanllapachu. <sup>40</sup>Piru Dyus imanu kriyinllapa nir yačharmapismi, nuqanchikkunapaqpis kusala shumaq kanqa niran. Chaynu nisha katinmi maydiyaqa tukuylana paypi kriyikunaqa tukuy chay arnimashan-chikllapataqa aypayashunllapa.

#### Jesucristulapi kunfyakashunllapa

**12** <sup>1</sup>Tukuy unay runakunami Dyuspi kriyishanrayku qischa-karmapis shachinakuranllapa, maydiyaqa Dyus arnimashanchiktaqa kumplimayashunllapa nir. Chayqami nuqanchikta sirbimanchikllapa, chay paykuna yupay kar chay arkamaqninchikta, chaynulla chay liyamaqninchikllapa chaykunataqa dijarna, ashwan Dyuslapi kunfyakar shachinakuna-llapapaq. Chaynu karnaqa, ashwan naypaqman kallpaq yupay, Dyus munashankunalata rurayta yarpushunllapa. <sup>2</sup>Nishaykillapapis, Jesucristulata chapar paypi allita kunfyakashunllapa. Chaqa shumaqchamanallapapaqqqa kusata qischakarmapis shachinakuran. Chaynumi pay yupay qischakarmapis shachinakushunllapa. Chaqa payqami chaynu kruspi wanunanpaq karmapis mana pinqakuranchu. Ashwanmi yačharan chaynu qischakayarmapis, maydiyaqa kusata aligriyanqa nir. Chaynulla Dyus mantakuyashanpiqa, allilaw qichqanpina taran.

<sup>3</sup>Chayrayku, imanutaq Jesucristo kashanpaq yarpuyllapa. Paytami kusalata qischaranllapa chay uchakuq-kuna. Chayrayku amami shaykur disanimakunkillapachu. <sup>4</sup>Chaqa qamkunaqa chaynu qischakarmapis

manaraqmi wanushaykillapachu, michka chay uchakunawan maqanakuq yupay karmapis. <sup>5</sup>Ashwan amami qunqankillapachu wamranna katkillapa Dyus willashutinllapaqa. Chaqa iskribikashakunapimi kaynu nin:

“Wamrituy, Amitunchik kastigashu-tinllapaqa kuytawkish mana kasutki.

Chaynulla anyashutinpis, amami disanimakunkichu.

<sup>6</sup> Chaqa Amitunchikqami mayqanta-pis munayashantaqa kastigan. Chaynullami wamranna kashaqa, llibachimanchik ima” nir.

<sup>7</sup>Qamkunata mana allinkuna pasashu-tinllapamapis shachinakuyllapa. Chaqa chayta rurashurllapaqami, Tayta Dyusqa wamrankuna katkillapa munashur chaynuqa rurashuyanllapa. Willamayllapa: ¿Manachu mayqanpis wamranta munar llibachin allinkunata ruray nir? <sup>8</sup>Piru Dyus qamkunata mana wakin wamrankunata yupay kastigashu-tinllapaqami, qamkuna mana chiqap wamrankuna kar, jwira wamrankuna yupayna kankillapa kanqa. <sup>9</sup>Chaynulla wamra kashallapamaqa, kay pachapi taytanchikkunaqa allinkunata ruray nir llibachimasha rispitaq kanchikllapa. Chaynu katinqa, ashwan ¿imapaqna mana kasushun Taytanchik Dyustaqa? Chaqa paymiri kawsanapaq bidanchikta qumanchik. <sup>10</sup>Piru taytanchikkunaqami kay pachapiqa uk ratulapaq kashamapis, pay yarpushannulla llibachimaqninchik allinkunata ruranapaq. Ashwan Dyusninchikqami llibachimanchik nuqanchikpa byinninchikpaq, maydiyaqa imanutaq paymaqa kusala shumaq chaynu kanapaq. <sup>11</sup>Chiqaptaqami ima kastigupis mana allinchu chay ratullaqa. Ashwanmi kusalata nanar llakichimanchik. Piru chaypaq allita intrakarqami, maydiyaqa kusa

shumaqta, allinlata rurarna kawsashunllapa.

### Kuytawkish Dyus nishanta mana kwintachashallapa

<sup>12</sup>Chayraykumi animakur shaykusha makillapata, qashan jwirsayjunpaq tikrayllapa. Chaynulla chay qunqurikillapa litalla kaqtapis jwirtichayllapa. <sup>13</sup>Chaynulla kusa shumaqta kawsar, dirichula nanta puriq yupayna kayllapa. Chaynuqami chay mana allita kriyitin, ēhakinllapa kuju yupay kaqkunaqa, allita kriyirna alliyaq yupay shumaqta kawsanallapapaq.

<sup>14</sup>Ukkunawanmi shumaqta kawsayta kamayllapa. Chaynulla Dyus munashannulla kawsayllapa. Chaqa Dyus munashanta mana rurar kawsaqqami, Amitunchiktaqa mana rikayta puytingachu. <sup>15</sup>Chayrayku uknikillapa uknikillapa kuytanakuyllapa. Chaqa mana chaynu karqami, imanupiqa mayqannikillapallaqa Amitunchik llakipashushanllapamanta chiqanchankimanllapa. Chaynulla, kuytawkish qamkunamanta uk qirupa ayaq ēchupan winaq yupay mayqanpis katin. Chaqa chaynu karqami, imanutaq chay ēchupamaqa ayaq kar mana shumaqchu, chay yupay ukkunata mana allinkunata rurachitin.

<sup>16</sup>Amami qamkunamanta mayqannikillapapis ukwan ukwan pununqallapachu, manaqa dasna mayqanwanpis punusha rikarinqachu. Chaynulla Amitunchik munashan kusa shumaq ima kaqkunatapis ama disprisyanqachu, imanutaq Esaumaqa<sup>e</sup> tukuran chaynuqa. Paymi uk mati mikuyllapaq kulaka wamra kashanrayku irinsyan kaqmatis pukuran. <sup>17</sup>Qamkunami yaĉhankillapa, "Chaymanta taytay shumaqcha-

may" nitinqa, taytanqa "Manana imanupis shumaqchashuya puytinichu" nir. Chayna kusalata waqatinmapis, chay pasashanpaqqa manana imatapis rurayta puytiranllapanachu.

<sup>18</sup>Qamkunami unay punta tratupi Israel runakuna yupayqa, Dyusman mana qimikashaykillapachu. Paykunqami qimikaran sirkaman. Chaypimi karan nina ratakuq, tutaparaq, puktay, kusa jwirti wayra ima. <sup>19</sup>Manami uyaraykillapapischu trumpitakunata, Dyuspa rimayninkunatapis. Piru chay uyaqkunaqami, rugakuranllapa amana masqa willananllapapaqchu. <sup>20</sup>Chaqa manari agwantayta puytiranllapachu kay mantakuykunawanqa. Chaqa kaynumi niq: "Mayqan chay sirkapi ēhakinta sarukuchiqa, rumillawan, manaqa lansawan, wanuchikanqa michka uk animal katinmapis" nir. <sup>21</sup>Kusa mana yaĉhakuyapaqmi karan chay rikashankunamapis. Chaqa pay Moiseslari kaynu niq: "Manchakurmi chukchukyayani" nir.

<sup>22</sup>Ashwan qamkunaqami, mushuq tratuwanna kar, chay qaqa Sión shutiqmanmapis qimikashaykillapa. Chaqa chaypimi kawsaq Dyuspa pwiblunmapis. Chay pwibluqami syilipi Jerusalén. Chaypiqami chiqapla achka angelkuna Dyusta alabananllapapaq tantakash. <sup>23</sup>Chaynulla ēharaykillapapis Dyuspa munashan wamrankuna syilipi tantakashanman. Chaypimi Dyuspa wamran kaqkunapa shutinqa iskribikasha. Qamkunami qimikashaykillapa Dyusman, chay tukupya jwisnimman, chaynulla tukuy chay kusa allin runakuna shumaqchakashakuna kayan chayman. <sup>24</sup>Jesucristumanpismi ēhashaykillapa, chay mushuq tratuta rurashanrayku. Chay yawarninwanmi

e 12.16 Rikashun Génesis 25.29-34.

uchanchikmanta paqamashanchikllapa. Chay yawarninmi, Abelpa yawarninmanmatapis kusa mas shumaq karan.

<sup>25</sup>Chayraykumi kuytakankillapa. Imanupiqakish chay willamaqninchikta mana kasuq yupay tukutkillapa. Chaqa Dyus, mana kasukuqkunata qayar kay pachapi willatinllapami mana kasurqa, mana mayman alsakaytapis puytirannlapachu. Chaynu katinqa nuqanchikkunamaqa syilumanta-pacha willamashallapa mana kasurqa, maymannari alsakashunllapa. <sup>26</sup>Chay tyimpupami, Dyusqa rimatinla pachamapis kusata kuyuran. Piru kananqami nin:

“Qashanmi nuqaqa kuyuchishaq mana pachalatachu. Ashwanmi syilumatapis kuyuchishaq” nir. <sup>27</sup>Chaynu “Qashan” nirqami, intrachimanchik chay tukuy kuyuq chaykunataqa, limpu chinqachiyanca nir. Piru chay mana kuyuq chayqami, mana chinqanqachu. <sup>28</sup>Dyus chay mantakuyashan pachaman apamayanchik chayqami, mana kuyunqachu. Chaymi chaypaq payji niyapaq Dyusta. Paytami adurashunllapa kusala rispitawan, imanutaq payta shumaqta yarpuchishannulla. <sup>29</sup>Chaqa Dyusninchikqami, imanutaq ninamaqa tukuya limpu rupachin chay yupay.

**Imanumi Dyusta shumaqta  
yarpuchishunllapa**

**13** <sup>1</sup>Qamkunaqami kriyiq masiykuna, maydiyapis waran waran uknikillapa uknikillapa llakipanakur kawsankillapa. <sup>2</sup>Chaynulla amami qunqarchu, mayqantapis wasikillapaman ēhatinqa, shumaqta samachinkillapa ima. Chaqa chaynumiri wakinkunamaqa mana yačhar, angelkunata ashwan samachiranllapa.

<sup>3</sup>Yarpunkillapami prisukunata, qamkunapis paykunawan prisukankimanllapa yupay. Yarpunkillapa-

pismi chay qischakaqkunapaq, qamkunapis paykunawan qischakayan-kimanllapa yupay.

<sup>4</sup>Tukuy runa kar, warmi kar, masay-junna karqa, kusalata rispitawan kawsanqallapa. Chaqa Dyusmi, chay runa kar, manaqa warmi masayjunna karmapis ukwan ukwan punuqkunata, chaynulla mayqan manaraq masayjun karpis pakaplla punuqkunatapis rikar kastiganqa.

<sup>5</sup>Amami qillaylataqa munankillapachu. Imayki kaqwanqami kuntintakayllapan. Chaqa Dyusqami kaynu niran: “Manami qamlata dijar qunqashay-kichu” nir.

<sup>6</sup>Chaymi Tayta Dyus imakunawanpis yanapamanchik nir kunfyakar, kaynu niyta puytinchik:

“Amituy yanapamatinmi, mana mayqantapis manchanichu.  
¿Imatana runa masiyqa ruramanqa?” nir.

<sup>7</sup>Yarpuyllapa chay runakuna yanapar Dyuspa rimayninta yačhachishuqkunapi. Chaynulla yarpuyllapa paykunaqa imanumi kawsayarllapaqa karan nirpis. Chayna imanutaq paykuna kriyillapa, chaynulla qamkunapis kayllapa.

<sup>8</sup>Jesucristumi paylla, quya, kanan, chaynulla tukuy tyimpupaq. <sup>9</sup>Amami qamkunaqa dijakankillapachu riqchaq yačhachikuykunata, chaynulla imakunatala mikur washakashunllapa nir yačhachishunllapapaqqqa. Ashwan allinqami tukuy shunqunchikwan Dyusninchik munamashanchiklapi kriyinallapapaq, chay mikulapaq yačhachikushanllapakunamantaqa. Chaqa manami yaqqa sribishachu chay mikulapaq yačhachikushanllapa-kunaqa.

<sup>10</sup>Jesucristo kruspi wanushanrayku, Tayta Dyus llakipar pirdunamanchikllapa. Jesucristo wanusha katin

nuqanchikkuna manana animalkunata wanuchirnachu, Tayta Dyusta sirbinchikllapa. Chayrayku chay naypaq kurakuna manana puytinllapanachu animalkunata wanuchir Tayta Dyusta shumaqta yarpuchiyya.<sup>11</sup> Chaqa chay kurakunapa mantaqninqami animalpa yawarninta apan kusala Santu kwartumanqa, uk ufrinda yupayna katin uchanllapakunamanta washakanallapapaq. Piru chay animalkunapa kwirpuntaqami, chay pwiblumantaqa waqtapi rupachinllapa.<sup>12</sup> Chaynullami Jesustapis qischar ima, pwiblumanta waqtapi wanuchiranllapa. Chayna yawarninwan runakunata shumaq allinpaqna tikrananpaq.<sup>13</sup> Chayrayku, imanutaq paymataqa mana kwintachar uklawman itakuranllapa, chaynulla nuqanchikkunatapis mana kwintachamshallapaqa, paywanna kayta yarpushunllapa.<sup>14</sup> Chaqa kay pachapiqami, nuqanchikkunapaqqqa mana tukuy tyimpupaq uk pwibluqa kanchu. Chaymi chay tukuy tyimpupaq shumaq pwiblu kaqman chanapaq yarpushunllapa.<sup>15</sup> Chaynami Jesusrayku maydiyapis Dyusta alabashunllapa. Kay alabayashanchikqami, imalataqa ufrinda nir wanuchiyanchik chay yupay kanqa. ¡Alabaypaqlapari shiminchikllapawan!<sup>16</sup> Amami qunqankillapachu allinkunatala ruraytaqa, chaynulla imayki kaqlawan ukkunata yanapaytaqa. Chaqa tukuy kaykunami, ufrinditakuna Dyusta kusa shumaqta yarpuchiir aligriyachiqqakanqa.

<sup>17</sup>Dyuspa rimayninta yañchachishuqllapa runakunatami kasunkillapa. Chaqa paykunaqami rikar kuytashuyanllapa, maydiyaqa imata rurashaypaqpis Dyus rikar yañchamayanqallapa nir. Chayraykumi paykunata aligriyachinaykillapaqqqa, imatapis allin kaqkunalata rurayllapa. Piru pinqaypaq imakunata

ruratkillapaqami, kwashallana kawsanqallapa.

<sup>18</sup>Nuqakunapaq Dyusman mañakunkillapa. Chaqa nuqakunaqami qamkunapaq kusa allinlata yarpur kawsanillapa. Chaymi imapi pis allinkaqla kayta yarpunillapa.<sup>19</sup> Chaynulla mañakunkillapapismi, mana tardarchu shamur watukushunayllapapaq.

### Tukukanantami saludakun

<sup>20-21</sup>Shumaqta kawsachikuq Dyusninchikmi, qamkunatapis shumaqchashunqallapa imapi pis. Chayna pay munashanta ruranaykillapapaq. Chaqa Amitunchik Jesucristo wanutinmi, yawarninwanna mushuq tratuta ruraran, tukuy tyimpuna pullachamana llapapaq. Chaymanta qashan kawsachimuran. Chayraykumi kananqa nuqanchikkuna uyshitankuna yupay kashana, kusa shumaqta michiq yupayna kuytamanchik. Chaynami Jesucristutaqa, tukuy tyimpupaqna alabashunllapa. ¡Chaynumi kanqa!

<sup>22</sup>Kriyiq masiykuna, imanupiqañchi qamkunata anyaq yupay kaykunata willashunillapa. Piru animachishunayllapapaqmi kayta iskribimuni qamkunamanqa.<sup>23</sup> Qamkuna yañchanaykillapapaqmi nishunillapapis, kriyiq masinchik Timoteo prisu kashanmanta yarqushana nir. Chayna daskaqla ñhamutinqami, nuqa watuku shuqllapa shamurqa, pullay apamushaq.

<sup>24</sup>Dyuspa tukuy allin kaqninkunata, chaynulla paypa rimayninta yañchachishuqllapakunatami, willankillapa saluduta kañhamunillapa nir. Chaynulla chay Italiamañta kaq kriyiq masinchikllapakunapismi, qamkunapaq saluduta kañhamunillapa.

<sup>25</sup>Chaymi Taytanchikllapa Dyusman mañakuni kusalata llakipar yanapashunllapapaq.

Chaynumi kanqa.